



Sensibilité politique  
Boîte postale 83  
L-7201 Bereldange

Fernand ETGEN  
President vun der Deputéiertechamber  
19, um Krautmaart  
L-1728 Lëtzebuerg



Lëtzebuerg, den 27/02/2020

Här President,

**Sou wéi den Artikel 83 vun eisem Chambersreglement et virgesäit, bieden ech lech, dës parlamentaresch Fro un de Minister fir Héichschoul a Fuerschung weiderzeleeden.**

Fir hier perséinlech Kompetenzen och no enger éischer Ausbildung während dem Berufsliewen nach auszubauen, entscheeden ëmmer erëm Léit sech fir weiderféierend berufsbegleedend Studiegäng.

Och op der Uni Lëtzebuerg gouf et eng Offer un esou Formatiounen. De Bachelor an de Sozialen-an Erzéiungswëssenschaften, de Bachelor an den Erzéiungswëssenschaften an de Master an der Gerontologie konnte bspw. op der Uni hei am Land berufsbegleedend gemaach ginn.

Leider ass op der Websäit vun der Universitét awer ze liesen, dass fir d'Studiejoer 2020/2021 keng nei Studente fir de berufsbegleedende Bachelor an de Sozial-an Erzéiungswëssenschafte wäerten ugeholl ginn, obwuel eng Umeldefrist vum 1 Abrëll bis den 31 Mai 2020 ugi gëtt, an dass fir de berufsbegleedende Bachelor an den Erzéiungswëssenschaften a fir de Master an der Gerontologie d'Umeldung schonns clôturéiert sinn, obwuel se fir dëst Joer nach net op waren.

An deem Zesammenhang wéilt ech dem Minister dës Fro stellen:

1. Kann de Minister bestätegen, dass fir d'Studiejoer 2020/2021 keng Studente fir de berufsbegleedende Bachelor an de Sozial-an Erzéiungswëssenschafte wäerten ugeholl ginn?

Kann de Minister bestätegen, dass Studenten sech fir d'Studiejoer 2020/2021 net fir de berufsbegleedende Bachelor an den Erzéiungswëssenschaften umelle kennen?

Kann de Minister bestätegen, dass Studenten sech fir d'Studiejoer 2020/2021 net fir de berufsbegleedende Master an der Gerontologie umelle kennen?

2. Wéi erkläert de Minister, dass dës Studiegäng net méi ugebuede ginn, obwuel grad am Beräich vum Fleegemanagement, vun der Educatioun a vun der sozialer Aarbecht e grouse Besoin un héichwäerteg qualifiziertem Personal besteet?
3. Wéi eng aner berufsbegleedend Studiegäng ginn op der Uni Lëtzebuerg fir d'Studiejoer 2020/2021 ugebueden?

Wéi eng aner Studiegäng goufen op der Uni Lëtzebuerg am Joer 2019/2020 nach ugebueden a gi fir d'Studiejoer 2020/2021 net méi ugebueden?

4. Ass et méiglech, dass déi Studiegäng, déi fir d'Joer 2020/2021 net méi ugebuede



[www.piraten.lu](http://www.piraten.lu)



Sensibilité politique  
Boîte postale 83  
L-7201 Bereldange

ginn, fir d'Joer 2021/2022 erëm zu der Offer vun der Uni Lëtzebuerg gehéiere wäerten?

5. Wéi bréngt de Minister d'Sträiche vun dëse Studiegäng mat den Ziler aus dem Koalitiounsaccord, d'Ausbildungsoffer an d'Méiglechkeete vum *Life Long Learning* weiderzeentwéckelen, an Aklang?

Mat déiwem Respekt,

CLEMENT Sven  
Député



[www.piraten.lu](http://www.piraten.lu)



LE GOUVERNEMENT  
DU GRAND-DUCHÉ DE LUXEMBOURG  
Ministère de l'Enseignement supérieur  
et de la Recherche

Le Ministre

Monsieur le Ministre  
aux Relations avec le Parlement  
Service central de Législation  
5, rue Plaetis  
L-2338 Luxembourg

Luxembourg, le 25 mars 2020

**Concerne:** Question parlementaire n° 1946 de Monsieur le Député Sven Clement au sujet des "Études en parallèle à une activité professionnelle proposées par l'Université du Luxembourg".

Monsieur le Ministre,

J'ai l'honneur de vous faire parvenir en annexe la réponse à la question parlementaire n° 1946 de Monsieur le Député Sven Clement au sujet des "Études en parallèle à une activité professionnelle proposées par l'Université du Luxembourg".

Veillez agréer, Monsieur le Ministre, l'assurance de ma considération très distinguée.

Claude MEISCH  
Ministre de l'Enseignement supérieur  
et de la Recherche



LE GOUVERNEMENT  
DU GRAND-DUCHÉ DE LUXEMBOURG  
Ministère de l'Enseignement supérieur  
et de la Recherche

Le Ministre

**Äntwert vum Här Minister fir Héichschoul a Fuerschung op d'parlamentaresch Fro n° 1946 vum honorabelen Deputéierten Sven Clement iwwert berufsbegleedend Studiegäng op der Universitét Lëtzebuerg.**

Ech reagéieren op dem honorabelen Deputéierten seng Froe mat dese Präzisiounen.

De berufsbegleedende Bachelor an de Sozial- an Erzéiungswëssenschaften op der Universitét Lëtzebuerg, deen 2017 zesumme mat der Salariatskummer lancéiert gouf fir dräi Cohortë vu Studenten, gëtt 2020/2021 fir ee Joer ausgesat, esou dass d'Organisatioun an de Format vum Programm kënnen iwwerschafft ginn. Vu dass d'Zuel vun de Kandidaten erofgaangen ass, gesäit d'Universitét Lëtzebuerg vir, de berufsbegleedende Bachelor an de reguläre Bachelor an de Sozial- an Erzéiungswëssenschaften ze integréieren, woumat déi akademesch Qualitéit vum Deelzäitprogramm op d'laang Dauer garantéiert gëtt. Den Informatiounen vun der Universitét Lëtzebuerg no kënnen d'Kandidate fir de berufsbegleedende Bachelor an de Sozial- an Erzéiungswëssenschafte sech fir d'Wantersemester 2020/21 an de reguläre Bachelor an de Sozial- an Erzéiungswëssenschafte deelzäit aschreiwen an da fir d'Wantersemester 2021/22 an den neie berufsbegleedende Bachelor an de Sozial- an Erzéiungswëssenschafte wiesselen.

De berufsbegleedende Bachelor an den Erzéiungswëssenschaften, deen 2016 lancéiert gouf am Kader vum Ofschaffen vum Reliounsunterricht am Enseignement fondamental, wor vun Ufank un fir dräi Joer konzipéiert ginn. Mam Ofschluss vun der leschter Cohorte gëtt dese Programm zougemaach.

De berufsbegleedende Master an der Gérontologie ass een Deelzäitprogramm, dee sech op 8 Semester streckt. De Programm adresséiert sech un eng kleng Zuel vu Kandidaten an dofir ginn d'Aschreiwunge generell nëmmen all zwee Joer op. Déi nächst Kandidaten kënnen sech also fir d'Studiejoer 2021/22 aschreiwe.

Fir d'Wantersemester 2020/21 gi ronn 25 berufsbegleedend Programmer op der Universitét Lëtzebuerg a verschiddenen Domainer ugebueden, an dat vum Zertifikat iwwert de Bachelor bis hin zum Master. Eng komplett Lëscht kann ënnert deem Link consultéiert ginn: [https://www.fr.uni.lu/formations/formations\\_continues](https://www.fr.uni.lu/formations/formations_continues). D'Offer entsprécht de Besoine vum soziale Secteur a vun den Entrepreneuren an Organisatiounen, déi hirem Personal d'Méiglechkeet wëlle ginn, fir sech weiderzubilden. Ofschléissend kann een och bemierken, dass en Deelzäitstudium an de meeschte reguläre Bachelor- a Masterprogrammer vun der Universitét Lëtzebuerg méiglech ass. Ausserdeem bitt den "University of Luxembourg Competence Center", den Nofolgerinstitut vum IUIL (Institut Universitaire International Luxembourg), eng vaste Palett vu Weiderbildungen um Héichschoulniveau un, an dat am Sënn vun der permanenter Weiderentwécklung vun de Méiglechkeete vum *Lifelong Learning*.